


*Towerlantern Fotografie*  
**fotografienuus**  
november 2021



*Metamorfose*  
Lensopening: f8; Sluiterspoed: 1 sekonde; Fokale lengte: 21 mm

Die somer is hier! En dit voel asof die winter nou die dag nog hier was. Dit bring ons maar net weer tot die besef dat ons aan tyd gekoppel is, en nie daarsonder kan leef nie: LENTE, SOMER, HERFS, WINTER.

Die wonderlike aspek van tyd, veral seisoene, is dat dit vir ons, fotografe en ander, wonderlike fotogeleenthede gee. Ook wat ander rigtings betref, byvoorbeeld musiek, is daar besondere seisoenbeskrywings. Miskien is Antonio Vivaldi se *Vier seisoene* die beste voorbeeld. Luister maar net na Itzhak Perlman se vertolking van die Allegro-gedeelte uit *Lente*, by <https://youtu.be/TKthRw4KjEg> 

Ons wil in hierdie uitgawe van *Fotografienuus* die aandag vestig op tydsverloop en hoe dit in foto's ingebou kan word. Dit kan op verskillende maniere geklassifiseer word, waaronder statiese tydsverloop (in een foto) en dinamiese tydsverloop (in 'n reeks foto's). Leer ken só iets nuuts wat jy met jou kamera kan doen. Geniet dit.

Johan

**Redakteur:** Johan de Klerk

**Bladuitleg:** Fransa van [Colourcode Designs](#)

*Wil jy graag 'n bydræ lewer tot Towerlantern se nuusbrieff? Kontak ons gerus vir meer inligting hieroor! Towerlantern behou die reg voor om sekere artikels / foto's nie te plaas nie. Menings uitgespreek in artikels is dié van die skrywers, en nie van Towerlantern self nie. Ons ontvang ook advertensies, doen gerus navraag.*

## — voorbladfoto

Die voorbladfoto is 'n voorbeeld van statiese tydsverloop. Hiermee word bedoel dat tydsverloop (in dié geval van roosknop tot roosbessie) staties met 'n reeks voorbeelde in een foto vertoon word. Dié tydsverloop word ook verwoord in die titel *Metamorfose*.

Soos by elke ander uitgawe van *Fotografienuus*, gee ons ook hier die tegniese besonderhede van die voorbladfoto: lensopening f8 (vir 'n effens groter velddiepte om skerpte deurgaans te verseker), sluiterspøed 1 sekonde (vir die korrekte beligting) en fokale lengte 21 mm (vir 'n wyer toneel, soos vanaf die kamera gesien).

Fotoreekse is op sy beurt 'n voorstelling van dinamiese tydsverloopfotografie. Hiermee word bedoel dat 'n reeks foto's wat oor 'n tydsverloop geneem is, as een saamgestelde foto of as meer as een foto vertoon word.

Lees verderaan waar ons dié sake bespreek en ook met meer foto's toelig.




# TYDSVERLOOPFOTOGRAFIE – AGTERGROND

Tydsverloopfotografie (Engels: *time lapse photography*) kan 'n baie boeiende fotografie-tydverdryf wees. Dit kan op 'n verskeidenheid maniere uitgebeeld word. Ons gee die volgende indeling:

## EEN FOTO (STATIES)






- Een enkele foto wat tydsverloop aandui (soos die voorbladfoto).
- Een enkele meervoudigeskoot-foto (soos die brug-toneel) waar tydsverloop 'n rol kan speel, of nie.

*Bruggie*



## MEER AS EEN FOTO (DINAMIES)

- Verskeie foto's wat tydsverloop aandui en moontlik vir effek saamgestel kan word as een prent (soos Maryke Schoonen se foto's in haar artikel hierna).
- 'n Verskeidenheid foto's wat opvolging van tyd voorstel (byvoorbeeld die sonsondergang-reeks hierby). Dit is ook die basiese beginpunt vir die skep van die illusie van beweging in films en videos.



*Sonsondergang*

# Loverslane-seisoene

MARYKE SCHOONEN

Foto's wat geneem word op dieselfde plek, maar oor 'n maandlange tydperk, het my nog altyd geïnspireer.


'n Persoonlike doelwit wat ek vir myself gestel het vir 2021 was om so iets aan te pak. Die grootste vraag natuurlik was, "Waar en wat sal ek afneem?"

*Loverslane* by die Potchefstroom-kampus van die Noord-Wes Universiteit was die opsie! Dit is 'n laning plataanbome baie naby aan my werksomgewing. Almal is verlief op die prag van die laning – ek dalk die meeste.

Die fotoreeks hierby was 'n toetslopie. Dit is 'n jaarlange onderneming en ek het besluit om dit per selfoon te doen.

Ongeveer elke 11e dag van die maand het ek op dieselfde plek in *Loverslane* gaan staan en 'n paar foto's geneem. Vir 'n suksesvolle fotoreeks is dit belangrik om dieselfde elemente in elke foto vas te vang. Ideaal gesproke sou mens dit op dieselfde tyd ook wou doen. Maar tog het dit hier gegaan oor die seisoenverandering eerder as die tyd van die dag. Die reeks hierby van Januarie tot Oktober 2021 spreek vir homself.

Vir 2022 beplan ek 'n soortgelyke fotoreeks, maar gaan dit hierdie keer met 'n driepoot en my kamera doen! Dit was hope pret en ek sien uit na die suksesvolle voltooiing hiervan.



Januarie

Februarie

Maart

April

Mei

Junie

Julie

Augustus

September

Oktober

*Towerlantern Fotografie*  
- november 2021 -

Loverslane, NWU, Potchefstroom-kampus

# TYDSVERLOOPFOTOGRAFIE – 'n gedagtespeletjie

Om 'n gevoel te kry vir tydsverloopfotografie kan jy die onderstaande stappe in jou gedagte (as 'n gedagtespeletjie) doen, of jy kan dit werklik uitvoer. Wees bewus daarvan dat tydsverloopfotografie tot op verskillende vlakke van gesofistikeerdheid geneem kan word. Ons verduidelik een hiervan, naamlik hoe die illusie van beweging geskep kan word.

- Neem 'n reeks van 5 opvolgende sonsondergangfoto's met gelyke tydsintervalle om 'n eenvoudige tydsverloop-fotoreeks te kry (byvoorbeeld soos in die vroeëre sonsondergang-reeks).
- Plaas 'n reeks foto's soos bogencemde in 'n PowerPoint-aanbieding. Laat dit outomaties aanbeweeg om sodoende 'n bewegende reeks te vorm. Jy het in beginsel 'n eenvoudige "video-aanbieding".
- Neem van 'n bewegende onderwerp 'n reeks foto's op gelyke tydsintervalle, sê 20 foto's in 20 sekondes. Doen dan die volgende eksperimente die een na die ander:
  - ✓ Speel dit terug in  $\frac{1}{2} \times 20 = 10$  sekondes. Jy versnel dus die fotoreeks en het 'n "die tyd vlieg"-aksie nageboots.
  - ✓ Speel dit terug in  $2 \times 20 = 40$  sekondes. Jy vertraag dus die fotoreeks en het 'n "kyk weer"-aksie nageboots.
- In die praktyk, met moderne video-tegnieke, is die proses natuurlik alles elektronies, maar die basiese idee bly steeds dieselfde.
- As jy (of jou kinders of kleinkinders) werklik pret wil hê gedurende die komende vakansie, maak 'n wonderwiel (soos hierna beskryf word). En as jy nog dieper in die saak wil indelf, kyk na die volgende bronne:

[https://en.wikipedia.org/wiki/Time-lapse\\_photography](https://en.wikipedia.org/wiki/Time-lapse_photography)



<https://www.canon.co.za/get-inspired/tips-and-techniques/time-lapse-photography-tips/>



# Maak 'n wonderwiel

Lank gelede, voor films en videos, is die illusie van beweging op verskillende maniere al gedoen. Een bekende voorbeeld is die sogenoemde wonderwiel (Engels: zoetrope).

Maak vir jouself een volgens die aanwysings by <https://www.wikihow.com/Make-a-Zoetrope>.



Photo by Matt Molloy

## OP INTERNET GESIEN

Oor die foto hierby sê die fotograaf Matt Molloy die volgende: *"Smearred Sky. Made from 500 photos, this is the first sunset time-lapse in which I tried the stacking method. I was surprised with the outcome, but even more so with the feedback. It wasn't long before it went viral. I was getting lots of emails, some asking questions about the technique and others hoping to share it on their website or blog. Milky Way scientists shared it on their Facebook page, and it got 12,000 likes and 4,000 shares on the first day it was up. I was blown away!"*

Lees meer by: <https://www.dpmag.com/how-to/shooting/the-art-of-time-lapse-photography/>



# RIGLYNE

## VIR TYDSVERLOOPFOTOGRAFIE

— STATIES —

Stel 'n enkeltoneel op wat tydsverloop voorstel (soos die voorbladfoto). Plaas die toneel-opstelling op 'n effekleurige agtergrond (byvoorbeeld 'n swart fluweeldoek) op 'n tafel of op die vloer.

### **KAMERA-INSTELLING:** Aanvaar die volgende:

Bogenoemde toneel is voor jou, die kamera is baie beslis op 'n driepoot, die komposisie is ongeveer reg en 'n rowwe fokussing is reeds gedoen. Volg die meegaande voorskrifte.



### **TIPE LENS**

Vul die foto so goed as moontlik. 'n Wyer lens sal beter werk as 'n smaller een.



### **FORMAAT**

Kies volgens behoefte.



### **ISO**

Stel die ISO laag, byvoorbeeld 100-200.



### **WITBALANS**

Stel die witbalans volgens die ligomstandighede, en eksperimenteer ook daarmee.



### **KEUSE VAN FOKUSPUNT EN ROWWE FOKUSSERING**

Besluit op 'n fokuspunt ongeveer in die middel van die toneel.



### **LENSOPENING**

Kies 'n middelgrootte lensopening eerder as 'n groot lensopenning sodat die velddiepte nie te klein is nie.



### **SLUITERSPOED**

Verstel die sluiterspoed met die liniaal vir die korrekte beligting. Oor- en onderbelig effens om 'n verskeidenheid foto's uiteindelik te kry.



### **FYN FOKUSSERING**

Maak gebruik van die LCD-skerm en sorg vir 'n absolute skerp fokussing van die hele toneel.

# RIGLYNE

## VIR TYDSVERLOOPFOTOGRAFIE

DINAMIES

Kry 'n enkele toneel wat met tydsverloop gaan verander, soos 'n laatmiddag tuintoneel. Besluit op die aantal foto's wat geneem gaan word en die tydsinterval. Neem dan hiervolgens met die hand of outomaties (sien volgende bladsy) die reeks foto's.

### TIPE LENS

Vul die foto so goeë as moontlik. Maak die beste lenskeuse vir die toneel.

### FORMAAT

Kies volgens behoefte.

### **KAMERA-INSTELLING:** Aanvaar die volgende:

Die kamerabattery is baie beslis ten volle gelaai. Die toneel is voor jou, die kamera is ook baie beslis op 'n driepoot, die komposisie is ongeveer reg en 'n rowwe fokussering is reeds gedoen. Volg die meegaande voorskrifte.

### ISO

Stel die ISO laag, byvoorbeeld 100-200.

### WITBALANS

Stel die witbalans volgens die ligomstandighede, en eksperimenteer ook daarmee.

### KEUSE VAN FOKUSPUNT EN ROWWE FOKUSSERING

Besluit op 'n fokuspunt ongeveer in die middel van die toneel.

### LENSOPENING

Kies 'n lensopening wat die toneel die beste sal laat vertoon.

### SLUITERSPOED

Effense oor- en onderbeligting vir variasie kan gedoen word, MAAR NIE IN EEN REEKS NIE.

### FYN FOKUSSERING

Maak gebruik van die LCD-skerm en sorg vir 'n absolute skerp fokussering van die fokuspunt.

WERD  
om te  
WEET

## Instellings vir outomatiese tydsverloopfotografie

Sommige kameras bied een of albei van die volgende outomatiese instellings-moontlikhede vir tydsverloopfotografie:

### MOONTLIKHEID 1:

Daar kan meer as een fotoskoot op 'n enkele foto geplaas word. Dit staan bekend as veelvuldige beligting (Engels: *multiple exposure*). Die vroeëre foto *Bruggie* is so geneem.

### MOONTLIKHEID 2:

Daar kan twee of meer foto's na mekaar outomaties op gereelde tydsintervalle geneem word. Dit staan bekend as 'n intervaltydhouer (Engels: *interval timer*). Die reeks by *Foto-idee 2* is so geneem.

Deursoek jou kamera se spyskaart en handleiding om te sien of jou kamera dié moontlikhede het. Dit is baie handig – maar nie onontbeerlik nie – vir tydsverloopfotografie. Ons kan help soek indien nodig; kontak ons gerus.

waardering  
van

*lesers*

OEEEE die mooiste fotos! My vingers jeuk om die verfkwas te vat!

**ANNA COETZEE**

Hierdie uitgawe van Fotografienuus [Oktober 2021] laat my voete en vingers jeuk. Ek het steeds groot waardering; en al is my fotografie-aktiwiteite tans dormant, hoop ek om teen volgende jaar weer op te warm. Geniet dit saam met almal – ek is net bietjie jaloes, maar dit is net my eie omstandighede.

**ENGELA VAN DER WALT**

Baie dankie vir die onlangse opdrag oor abstraktekleur-fotografie. Aanvanklik het ek gewonder hoe ek die opdrag gaan doen, iets heeltemal buite my gemaksones. Die naweek het ek toe aan fotografie spandeer. Soms baie foto's geneem, soms moedeloos geword, ander kere minder foto's geneem en moed gekry. Aan die einde was elke oomblik 'n vreugde!

**VERONICA HEERSINK**

# SKILDERKUNS versus *Fotokuns*

---

LALLIE CAMPHER

---



*Drie figure*

Voordat ek fotografie as stokperdjie begin geniet het, het ek belang gestel in skilderkuns. Ek het vir drie jaar klas geloop en veral gefokus op waterverf en figuurtekeninge. Ek het ook kunslesse in waterverf, olieverf en *collage* (skilder met papier) by 'n vriendin geneem. Hierdie agtergrond het my gehelp om die basiese kunsbeginsels onder die knie te kry, wat natuurlik ook op fotografie van toepassing is.

My liefde vir fotografie het aanvanklik by foto's van my kleinkinders, vakansies en toere begin. Ek het besef dat fotografie, soos ander kunsvorme, jou leer om met ander oë na alles om jou te kyk. 'n Mens neem as't ware alles in prentjies waar!

vervolg op die  
volgende bladsy



*Towerlantern Fotografie*  
- november 2021 -



In 2009 het ek my eerste goeie kamera as geskenk gekry en lesse by Towerlantern Fotografie begin neem. My kameras het daarna weer opgegradeer as gevolg van geskenke! As ek na my eerste pogings kyk, beseft ek hoeveel ek geleer het onder leiding van Johan de Klerk en Johann Nel.

Ná die Beginnerskursus het ek verskeie Gevorderde kursusse, insluitend 'n Selfoon-fotokursus, voltooi. Ek is ook nou deel van die Fotovriende-groep, wat die lig gesien het tydens die Covid 19-grendeltydperk. Johan de Klerk gee elke maand aan ons nuwe uitdagings. Ons leer geweldig baie by mekaar. Behalwe dat dit heerlik is om die ander se foto's te sien is dit vir my besonder interessant om die Fotovriende-deelnemers se individuele benaderings tot dieselfde onderwerp te sien. Dis

opmerklik dat elke persoon sy/haar eie aanslag en voorliefde het. Hierdie unieke patroon is soms so sterk dat ek individue aan hulle foto's kan uitken.

My persoonlike voorliefde is impressionistiese en abstrakte foto's, veral omdat daar dikwels (soos met waterverf) iets onvoorspelbaars gebeur. Die neem van hierdie tipe foto's is van die tegnieke wat ons deur die toepassing van byvoorbeeld kamerabeweging en zoemsarsies by Towerlantern geleer het.

Ek kan fotografie as stokperdjie baie sterk aanbeveel, veral vir ouer mense of alleenlopers. Ek is oortuig daarvan dat fotografie uitstekende breinsoefening is (en natuurlik sommer ook goed is vir jou algemene fiksheid omdat jy dikwels moet beweeg om daardie mooi foto te verdien!). Dink maar net aan die breinontwikkeling wat noodgedwonge moet plaasvind wanneer jy jou ingewikkelde kamera, asook die rekenaarvaardighede wat daarmee gepaard gaan, moet bemeester! Dan is daar natuurlik die wonderlike sosiale voordeel van nuwe vriende (en die herontdek van ou vriende), met wie jy so 'n lekker belangstelling deel. Vir my was dit 'n besondere bonus dat ek, as direkte uitvloeisel van fotografie, 'n ou kennis (wat my aanvanklik nie kon onthou nie!) raakgeloop het ... en die res is geskiedenis!



*Lallie Campher woon in Ventersdorp.  
Sy en Johann Nel is 'n paar jaar gelede  
getroud.*

# TYDSVERLOOPTONELE *in die verlede*

Tydsverloopfotografie is dalk 'n relatief nuwe begrip, maar tydsverloopskilderwerk in die geskiedenis is niks nuuts nie. Die verloop van tyd, en die gepaardgaande verandering van lig, was juis die inspirasie wat gelei het tot die ontstaan van die kunsvorm bekend as impressionisme.

Claude Monet (1840-1926) was een van die bekende kunstenaars van die impressionistiese genre. Hy het gedurende die 1890's 'n reeks studies gedoen oor die Rouen Katedraal – telkens in verskillende ligomstandighede. Die saamgestelde foto wys dit is elke keer dieselfde aansig, maar let op hoe die kleure verskil.

Onthou, die impressioniste het juis gefokus op lig en hoe dit iets kan verander en betowerend maak met verandering van tyd en omstandighede.

Rouen-katedraal:

[https://en.wikipedia.org/wiki/Rouen\\_Cathedral\\_\(Monet\\_series\)](https://en.wikipedia.org/wiki/Rouen_Cathedral_(Monet_series))



# DRUKWERK IN DIE VERLEDE

Soms dink jonger mense hul ouers, of oupas en oumas, is dom mense; veral as dit by elektroniese sake kom. Hulle weet niks.

Miskien is jonger mense dalk reg – maar onthou, ouer mense het meganiese kennis wat jonger mense eenvoudig niks van weet nie. Baie voorbeelde kan genoem word om dié bewering te staaf.

Ons was onlangs by 'n restaurant waar daar allerhande ou goete uitgestal word, onder andere 'n vergelykbare model as die “masjien” in hierdie foto. Die masjien is 'n arolmasjien en is gebruik vir kopieerwerk. Die teks is getik op 'n sogenoemde wasvel. Die tikwerk het die wasvel effens geperforeer. Dan is die wasvel in hierdie masjien om 'n roller gesit. 'n Pak papier en ink is in die masjien gesit en bladsy vir bladsy afgerol met die slinger regs. Een draai van die slinger, een kopie. Dit het gewerk, selfs al was daar 'n kragonderbreking (wat seldsaam was) omdat dit bloot hand-meganies was.

As iemand – ouer mense? – deedæ nog sou praat van arol, bedoelende kopieer, dan weet jy dit is 'n terugverwysing na hierdie proses.

Bron: <https://www.4x4community.co.za/forum/showthread.php/280352-Nostalgia-Cool-Devices-from-my-Childhood>



# FOTO- *idees*

Idee 1: Kunswerk

Skep 'n fotoreeks waarin die sewe kleure van die reënboog voorgestel word.

*Towerlantern Fotografie*  
- november 2021 -

# FOTO- *idees*

Idee 2: In jou tuin

Neem in jou tuin 'n reeks tydsverloopfoto's (5 foto's met tydinterval 15 minute, in totaal dus 1 uur) met die klem op interessante agtergrondtonele, byvoorbeeld bokeh-effekte.

*Towerlantern Fotografie*  
- november 2021 -

# FOTO- *idees*

Idee 3: Mensgemaakte strukture


Ry deur jou distrik en maak 'n fotoreeks van mensgemaakte strukture soos windpompe, kragpale, ensovoorts.

*Towerlantaarn Fotografie*  
- november 2021 -

# FOTO- idees

Idee 4: Uit vergange jare

Beeld met twee mensfoto's die verloop in dekades uit, van jouself, jou ouers, jou kinders, of iemand anders.



*Towerlantern Fotografie*  
- november 2021 -



## KERSGESKENKE

Elkeen skrik jaarliks teen November as jy besef die jaar loop na sy einde toe. Ons is reeds byna deur al die seisoene waaroor ons in ons inleiding gesels het. Die Covid-19-pandemie het sekerlik ook gemaak dat die jaar vinniger onder ons uitgegely het as ander jare.

Sluit nogtans 2021 af met 'n besondere Kersgeskenk aan iemand in jou familie of vriendekring. Oorweeg dit om vir iemand in te skryf vir een van ons aanlynfotografiekursusse. Ons kursusse word op verskillende vlakke aangebied en is tans R1000 per kursus. Die kursusse bestaan uit verskillende lesings wat die een na die ander afgehandel word. Een aspek van ons kursusse is dat ons klem lê op praktiese fotografie-opdragte; en ook in Afrikaans.

Doen gerus navraag.

## 2022 se kursusse – plaaslik en aanlyn

Ons bied vier verskillende plaaslike en aanlynkursusse in Afrikaans aan:

'n **EERSTEVLAKKURSUS** waarin ons by die heel begin begin. Dié kursus behels sake soos komposisie, lig en kamera-instellings. As jy wonder waar jy moet begin, dan is dit hier.

Prys: R1000.

'n **GEVORDERDEVLAKKURSUS** waarin ons die basiese onderwerpe van die eerstevlak verder voer. Aandag word aan verskeie genres gegee en die lyn word deurgetrek na impressionistiese fotografie.

Prys: R1000.

'n **SPECIALISKURSUS** waarin op enkele onderwerpe (3 tot 4 per kursus) gekonsentreer word. Hierdie kursus word plaaslik en aanlyn gesamentlik aangebied.

Prys: R1000.

'n **SELFOONKAMERAKURSUS** waarin die basiese elemente van fotografie bespreek word, met toepassing op jou selfoon. In hierdie kursus sal jy meer leer hoe om besondere foto's te neem en hoe om basiese fotoverwerking op jou selfoon te doen. Aantal lesings: 4.

Prys: R500.

Daar is steeds die permanente reëling dat daar 'n goedkoper tarief is as twee persone uit dieselfde gesin saam aan 'n kursus deel het.

Doen vir al hierdie kursusse navraag by:  
[johan@towerlantern.co.za](mailto:johan@towerlantern.co.za)

*Towerlantern Fotografie*  
- november 2021 -